

Jisas.

I no gat narapela rot, a?

Long Papua Niu Gini i gat planti misin i stap na planti toktok i stap. Wanpela misin i ken i tok olsem, “Mipela trupela misin i stap. Yupela kam long misin bilong mipela na bai yupela i go long heven.”

Tasol narapela misin bai kirap na tok, “Nogat. Mipela trupela misin na sapos yupela lusim mipela na yupela i go long narapela misin, orait bai yupela lus long hel. Mipela i trupela wei tasol.”

Na sampela misin i tok, “Manmeri i lukautim de Sabat ol i bihainim trupela rot na ol bai i go long heven, na ol narapela manmeri nogat, ol i Seten lain tasol.”

Na narapela misin i tok olsem, “Yupela mas kisim baptais na konfamesen na Lordsapa na yupela ken i go long heven. Sapos yupela no kisim ol dispela samting na bihainim ol dispela rot, orait yupela no inap i go long heven.”

Planti misin i mekim tok olsem, “Yupela mas stretim laip bilong yupela na lusim olgeta sin pasin na stap stret na yupela ken i go long heven long dispela rot. Sapos yupela no bihainim dispela rot, orait yupela bai lus tasol.”

Na i no ol misin long ples i save mekim planti toktok olsem. Nogat. Long taun nabaut planti ol narapela kain lotu i stap, olsem ol Muslim na Jehova Witnis na Moman na ol kain lotu olsem. Na yu save, tok bilong ol i narapela kain. Tasol ol i save tok, “Rot bilong mipela i trupela rot na ol narapela rot i rot bilong i lus.”

Na yumi manmeri nating, yumi save paul long toktok bilong ol kainkain lotu. Yumi save tingim olsem, “Husat i tok stret? Wanem wei em i trupela wei bilong kisim nupela laip na i stap wantaim God long heven?”

Jisas Em i birua bilong ol dispela kain toktok.

Jisas Kraus Em i birua bilong ol dispela kain toktok, na Jisas i kapsaitim tok bilong ol. Jisas Em i tok.....

“Mi yet Mi rot, na Mi as bilong Tok i tru, na Mi as bilong laip. I no gat wanpela man inap i go long Papa long narapela rot. Nogat. Long Mi tasol.” Jon 14:6.

“Dispela man Jisas, Em i ston yupela ol wokman i bin lusim, tasol nau Em i kamap as ston. Na i no gat narapela man i stap na bai mipela i kisim laip long em. Long wanem, long olgeta hap long dispela graun God i no givim narapela nem long mipela na bai mipela i kisim laip long em.” Aposel 4:11-12.

Em i klia olsem, i gat wanpela rot bilong sin manmeri i ken i kisim laip i stap oltaim oltaim, na dispela rot em i Jisas Kraus tasol. Dispela tok Jisas i mekim em i katim olgeta narapela rot.

Olsem na, pasin bilong lukautim de Sabat em i no rot. Pasin bilong stretim laip bilong yu na sindaun gutpela em i no rot. Na pasin bilong kisim baptais na konfamesen na Lordsapa em i no rot. Na misin pasin em i no rot. Na wanpela misin em i no rot. Na narapela kain lotu em i no rot.

Jisas wanpela Em i rot bilong manmeri i ken i kisim laip.

Tok bilong Jisas i klia olgeta. Mi yet Mi rot. Wanpela man i no inap i go long Papa bilong Mi long narapela rot. Nogat. Long Mi tasol. Wanpela man i no inap kisim laip long narapela rot. Nogat. Long Mi tasol. Wanpela man i no inap abrusim pe bilong sin na kisim laip long narapela rot. Nogat. Long Mi tasol.

Na Jisas i tok tru o nogat? Yumi harim tok bilong Jisas pinis. Tasol inap yumi trastim dispela tok bilong Jisas, a? Jisas i tok tru o Em i giamanim yumi tasol, a?

Hau na bai yumi save Jisas i tok tru o nogat? Ol sampela pasta i tokaut long ol narapela rot, tasol hau na bai yumi klia olsem, ol i tok tru o nogat? Jisas i kapsaitim tok bilong ol pasta i tokaut long ol narapela rot. Na ol dispela pasta i save kapsaitim tok bilong Jisas. Em olsem na, hau na bai yumi klia husat i tok tru?

Jisas wanpela tasol i kirap long matmat na Em i no inap i dai gen.

Ol pasta na ol tisa bilong ol misin na ol waitman na ol lida bilong ol narapela kain lotu, ol i stap man olsem yumi tasol. Ol i save kisim sik olsem yumi save kisim sik. Na sin i save spoilim laip bilong ol olsem sin i save spoilim laip bilong yumi. Na bihain ol bai dai olsem yumi bai dai. Na ol bai planim ol olsem ol bai planim yumi. Yu save, olgeta saveman bilong lotu ol i olsem yumi tumas. Ol i manmeri bilong dispela graun.

Tasol Jisas Em i narapela kain man. Em i no gat wanpela man i stap olsem Jisas Krai. Tingim. Jisas wanpela tasol i kirap bek gen long matmat na Em i stap laip na Em i no inap i dai gen. Nau Jisas i stap laip na i stap wantaim Papa bilong Em long heven.

“Papa bilong Mi i lavim Mi tru. Long wanem, Mi bai lusim laip bilong Mi, na bai Mi kisim bek gen. I no gat wanpela man inap pinisim laip bilong Mi. Nogat. Long laik bilong Mi yet Mi bai lusim laip bilong Mi. Mi gat strong inap long lusim laip bilong Mi, na Mi gat strong bilong kisim bek gen.” **Jon 10:17-18.**

Ating, yumi mas harim tok bilong dispela man! Em i gutpela tumas long yumi harim tok bilong dispela man Jisas.

Jisas Em i Pikinini Man bilong God.

Na taim yumi harim tok Jisas i mekim long Baibel yumi no harim tok bilong wanpela lotu tisa man nating, nogat. Jisas i no olsem ol pasta na ol tisa bilong misin na ol waitman, nogat. Jisas Em i Pikinini Man bilong dispela trupela God i no gat stat bilong Em na i no gat pinis bilong Em. Jisas Em i God. *“Mi na Papa bilong Mi i wanpela.”* **Jon 10:30.**

“Na gen namba wan het pris i givim askim long Jisas olsem, ‘Yu Krai, Pikinini bilong dispela holi God mipela save lotu long Em o nogat.’ Na Jisas i tok olsem, ‘Mi dispela man. Na yupela bai lukim Pikinini bilong Man i sindaun long han sut bilong God i gat olgeta pawa. Na bai yupela lukim Em i kam antap long klaut bilong heven.’” **Mak 14:61-62.**

Olsem na, taim Jisas i tok, *“Mi yet Mi rot. I no gat wanpela man inap i go long Papa long narapela rot. Nogat. Long Mi tasol,”* Em i no bikhet na Em i toktok. Nogat. Em i gat namba na tok Em i mekim yumi ken i trastim.

Jisas wanpela Em i rot.

Jisas i tok *“Mi yet Mi rot”* bikos Jisas i bin mekim wok long diwai kros bilong stretim sin manmeri.

“God i bin salim Krai Jisas i kam, na Krai Jisas i kisim pe bilong sin na Em i dai, na blut bilong Em i kapsait bilong tekewe bel hat bilong God long sin bilong manmeri i bilipim na trastim Krai Jisas.” **Rom 3:25.**

“Krais yet i no save liklik long sin. Tasol, bilong helpim yumi, God i mekim Em i kamap sin samting. God i mekim olsem bai yumi, long wok bilong Krais, i ken i kamap stretpela manmeri bilong God.” 2 Korin 5:21.

Em olsem na, sapos yu tingim olsem, ol narapela rot i trupela rot, orait dispela i olsem yu tingim olsem, Jisas Em i tok giaman na wok Em i bin mekim long diwai kros em i samting nating.

Sapos yu tingting olsem yu bai go long heven long rot bilong lukautim Sabat, orait dispela i olsem yu tok, “Jisas Em i giaman.” Sapos yu tingim olsem yu bai go long heven long rot bilong gutpela pasin bilong yu o long rot bilong baptais o long rot bilong konfamesen o long rot bilong kaikaim Lordsapa, orait dispela i olsem yu tok, “Jisas Em i giaman.”

Na sapos yu tingim olsem ol dispela narapela rot i ken i **sapotim** rot bilong Jisas, o sapos yu tingim olsem ol dispela narapela rot **wantaim** wok bilong Jisas i ken i sevim yu, orait dispela i olsem yu tingim olsem, Jisas Em i giaman na wok bilong Em i no inap long yu. Jisas i tok, “Mi yet Mi rot.”

Bai yu trastim dispela tok bilong Jisas o nogat?

Nau yu mas tingting gut. Bai yu trastim dispela tok bilong Jisas o nogat? O bai yu trastim tok bilong ol man i tokaut long ol narapela rot, a? Bai yu trastim laip bilong yu long Jisas na putim laip bilong yu long han bilong Em o nogat? O bai yu putim laip bilong yu long han bilong ol misin, a?

Jisas wanpela i bin mekim wok bilong stretim sin manmeri, na Jisas wanpela Em i bos. Olsem na, bai yu trastim wok Jisas i bin mekim, na bai yu stap aninit long Jisas na Em i stap bos bilong yu, o nogat? Yu yet yu mas skelim tingting bilong yu.

“Tasol nau, Em (God) i tok strong long olgeta man long olgeta hap bilong dispela graun olsem, “Yupela mas tanim bel.” Long wanem? Em i bin makim wanpela de we Em bai kotim olgeta manmeri. Em bai mekim olsem long stretpela pasin bilong Em. Na Em i makim wanpela man na Em bai i stap jas long dispela kot. Na taim God i kirapim dispela man long matmat Em i soim olgeta manmeri dispela i tru tumas.” Aposel 17:30-31.